

大方廣佛華嚴經普賢行願品別行疏鈔卷第十二

唐圭峯草堂寺沙門宗密隨疏鈔

△疏二顯經勝德二一校量聞經德

經若有善男子善女人

鈔第二顯經勝德分中言善男子善女人者。束而
言之。有九律儀。言之有七。卽男三女四。男三者。在
家有一。卽五戒近事男也。出家有二。卽比丘及沙
彌也。女四者。在家有一。卽五戒近事女也。出家有
三。卽比丘尼六法尼沙彌尼。故有七也。更兼有非
受戒男子女人二般。故成九也。以此等九攝盡劫

外劫內一切善男女也。

經以滿十方無量無邊不可說不可說佛刹極微塵數。一切世界上妙七寶及諸天人最勝安樂。

鈔言七寶者真諦記中說諸寶類總有一百八種舉勝而言七寶攝盡。一金二銀三珊瑚四赤真珠赤蟲所出。或體赤色。五末尼珠即如意珠也。六砮磲其體如石青白間色。七碼碯。此與阿彌陀經少異可知。

經布施爾所一切世界所有眾生供養爾所一切世界諸佛菩薩經爾所佛刹極微塵數劫相續不斷所

得功德若復有人聞此願王。一經於耳所有功德比前功德百分不及一。千分不及一。乃至優波尼沙陀分亦不及一。

△疏二顯餘眾行德。二總明法行。略說功德。

經或復有人以深信心於此大願受持讀誦。乃至書寫一四句偈。

△疏總明法行也。總有十種。一書寫。二供養。三轉施。四聽聞。五披讀。六受持。七開示。八諷誦。九思惟。十修習。今但有四。謂一受持。二讀。三誦。四書寫。兼前聽聞唯舉五行。乃至二字義攝所餘。

鈔言一四句偈者梵云鉢陀正云跋那此翻為句。準婆沙論有其五種今取五內處中句即八字為一句也。即當此間五字或四字句等言偈者梵語伽陀此翻為頌即四句為頌言一四句者取其最少不過一四句也。又顯義團圓目之為句。一義圓足名一四句也各是一意。今此意云若人受持此經一四句偈便能除滅五無間業等也。先通明十種法行言法行者總有十種如疏列名。一書寫者。有人為重法故常自書寫經典。二供養者。有人常以香華供養經法。三轉施者。有自解書寫施與他

人轉讀或自轉念以此功德回施於他四聽聞者。有人常在法會聽聞教法。五披讀者。有人常披覽教法對文而讀。六受持者。有人受持經典極不忘失。七開示者。有人自得義味恆時開演曲示他人。八諷誦者。有人記憶文句常自歌諷千徧萬徧。九思惟者。有人聞教已思惟義理生得慧解。十修習者。有人自達教旨依法修行。此亦名十法師於中。一是人法師能解義理故法之師。餘九法即師。此十法行辯中邊論頌云書寫及供養施他聽披讀受持及開演諷誦與思修則通而言之謂受持大

乘教法入理之方便也。賢首大師所製華嚴三昧觀門第二簡教門中假問云：眾生修行爲要受持聖教耶？爲要捨教耶？答有十類：一者自有眾生無識，懸捨聖言，師自愚心，復隨邪友，違教修行，巧偽誑惑，此爲惡人也。二者又有眾生亦背聖教，以質直心，謂爲出要，勤修苦行，竟無所益，此上二人俱捨聖教，不依義理。三者唯誦聖言，不解義意，依傍聖教，求名求利，違自所誦，亦名惡人。四者唯逐文句，不知義理，但以直心讀誦，雖無巧偽，亦無所益。此上二人俱不捨教，不得義理，如上四門皆不可

652

依五者讀誦聖言，分知解行，多讀文句，少有修行。六者廣尋聖教，偏知解行，漸略聖言，取意專修。七者受持得意，唯在修行，不復尋言。八者尋教得旨，知一切法無不稱性，是故於教亦不待捨，卽此言教稱性，約教修行。九者常持稱性之教，不捨不著，恆觀絕言之理，不棄不滯。此上五門，猶未究竟。十者尋教得實理，教無礙，常觀理而不礙，教常持，教而不礙理，此卽理教俱融，合爲一觀，方名究竟。此上十門，前四門全不可依，次五門從淺至深，隨根悟入，然但是革凡成聖之方便，猶未究竟。唯第十

653

門方爲究竟也。又賢首大師云。受持大乘經須知五法。一須明其文有五。謂善知分段起盡前後相屬次第連合。詮旨圓滿無增無減。二解其事亦五。謂說處說主徒眾請儀及知圖音所說。三達其義亦五。謂略標綱要廣釋除疑譬喻令解引事證成。舉益勸學。四得其意亦五。謂令發大心觀真理伏煩惱慈悲救物勤修萬行。五順其行自有五種。一於前四門法行在身。二在心未曾暫息。三歷前四門以起勝心。謂於前文教起難遭想。於前事相起尊重心。念佛難逢。傷已薄祐。於前義理起愛樂心。於

前意旨悲喜交集。三受持正法。謂於前文教書寫流通圖畫形相表佛法會撮略意旨。曲示行人。四自行增。謂親近善友。繫念思惟。五成無礙行。謂得旨亡詮。故不可守。亡詮由教。故不可捨。是故於教生無守無捨行。今此雖開爲十法行。但是眾緣資成正助相兼。總曰受持修習。全依此者。可爲圓因。精勤不退。皆證滿果。自教至大唐。古今有依法修學者。靈通感瑞。其類實繁。具如華嚴傳五卷。纂靈記兩卷所說。略而言之。謂一書寫經。擇五色。卽後魏王延明。王元熙。英明博達。嘗以香和金寫經。一

百部每部五香爲蘇七寶函盛日夜清齋行道卽
 放神光五色照燭庭宇眾所咸覩因而發心者不
 可計數也栴香四達僧德圓妙統宗極修一淨圓
 種栴鮮華香草雜之每洗浴方入圓概以香水栴
 生三載香氣四達後以爲紙寫經纔書數行每字
 皆放光明也二供養瑞鳥嚙華僧法誠於藍谷造
 華嚴堂畫七處九會變相兼寫此經專精供養每
 有瑞鳥形色非常嚙華入室旋遶供養也三轉施
 灌掌之水尚拯生靈僧彌伽多羅師子國第三果
 人因至西太原寺遇諸僧轉華嚴經忽然改容云

656

不知此處亦有此經合掌歡喜讚歎言曰此大方
 廣經功德難思西域相傳有人稱讚此經以水灌
 掌水沾蟲蟻而捨命者皆得生天何況受持讀誦
 思惟觀察等四聽聞功齊種智金剛菩薩云聞此
 法門如一切智行所集福德五披讀眇然履空隋
 朝禪定寺僧慧悟持華嚴經與持涅槃經僧同隱
 終南巖棲木食各專其業後有一人請齋二人相
 讓請者云請華嚴悟和尚卽便隨往乃是山神千
 羅漢皆推之令於上坐齋畢神呼一童令侍乃入
 悟口便得神通卻歸取經辭涅槃僧眇然履空而

657

去莫知所往。六受持煥若臨鏡。僧辯才事裕法師
 學華嚴經久而不悟淨室專精。三年乃夢普賢指
 授覺後悉通煥然猶如臨鏡也。七開示華梵通韻
 宋朝三藏求那跋陀羅天竺人精華嚴來至此土
 七百餘人請講恨以華言未通禮懺虔請乃夢一
 人執劔持一人頭劔卻跋陀羅頭安提來者遂通
 唐言講數十徧故云通韻。人天共遵魏朝勒那三
 藏中天竺人既至此土華音又通講華嚴經次忽
 有一人執笏形如天官云天帝令請師講華嚴經
 都講維那梵唄咸須同去。勒那曰待講畢去得否。

使云可爾。及講終即與都講等奄然卒於法座之
 上。人皆歎仰神光入宇。法藏和尚字賢首十七辭
 親求法於太白山後母病歸覲時儼和尚於雲華
 寺講華嚴經至中夜忽見神光照燭庭宇。知有異
 人及明過儼和尚即敬事之深入華嚴旨趣也。良
 以一丈之妙攝義無遺故一偈之功能破地獄也。
 京兆人姓王不得名死被二人引至地獄見一僧
 云是地藏令誦偈云若人欲了知三世一切佛應
 觀法界性一切唯心造遂得解脫聲所至處有受
 苦者悉脫其苦後一日卻蘇憶持此偈向道俗說

諸德尋經方得知是華嚴經夜摩天偈也。入諷誦
每舍舍利安定郡樊玄智依順和尚誦華嚴經每
因誦經口中頻獲舍利前後數百粒也。適會神僧
京兆苑律師貞觀年初宿灞橋店有一僧同主人
別房安下飲酒噉肉律師持戒精潔勃然戒之其
僧餐了以灰水嗽口誦華嚴經俄終一軸未滿五
更一部都畢其律師入房悲泣懺謝訖至明便乃
分袂不告名字不知所至九思惟則無生入證偈
讚排空卽解脫和尚臺山佛光寺立精舍讀華嚴
經依經作佛光觀又求文殊得見云何須禮我可

自悔責後因自求乃悟無生遂欲廣禮諸佛證此
因緣感諸佛現與說偈言諸佛寂滅甚深法曠劫
修行今乃得若能開曉此法眼一切諸佛皆隨喜
又問寂滅之法若爲可說教人佛卽隱身但有聲
曰方便智爲燈照見心境界欲究眞實法一切無
所見十修習海神聽而時雨霧靈懼道英亳州人
年至十二親爲之娶五年同居全無世事後因聽
講華嚴經乃出家入太行山柏梯寺修止觀時年
天旱唯講華嚴感二人云是海神來聽講經遂令
下雨須臾霧霽也天童迎而大水瀰漫隋朝靈幹

講華嚴經住興善寺常作兜率及華嚴觀臨終之日有天童來迎而不隨去云吾志在華藏矣尋見大水瀾漫蓮華滿中乃忻然曰此果吾願遂與同住僧重真相別別訖奄然而逝也

經速能除滅五無間業所有世間身心等病種種苦惱乃至佛刹極微塵數一切惡業皆得消除

鈔言五無間業者梵云半左阿難他哩反也哩野尼迦云五無間或云阿鼻獄或云阿毗古譯云無擇或云無間具其四義或五義也一受生無間二壽命無間以無中天者三身量無間以身徧滿故

四受苦無間無等流處所故五受報無間以決定順生故由具上五義故名無間隨造一業便招此報所言五者即五逆罪謂殺父害母出佛身血殺阿羅漢破和合僧此五隨犯一件皆得逆罪墮阿鼻獄經一中劫受無間苦故名五無間業又此五逆有小大之異上說五逆猶是小逆佛月藏經等名為大逆故彼第八云但出一佛身血得無間罪尚不可算墮阿鼻獄况出萬億佛身血者終無有人說彼罪報若有惱亂罵辱打縛為我剃髮著袈裟片縷不受禁戒及破戒者得罪多彼况持戒者

故名爲大。下偈中云極惡五無間也。又四重罪名。近無間。其罪亦重。故名爲近。除普賢願王及陀羅尼法威德力無能除滅也。言所有世間身心等病者。依涅槃經說有二種。一者身病。二者心病。身病有五。一者因水。二者因風。三者因熱。四者雜病。五者客病。客病有四。一者非分強作。二者忘誤墮落。三者刀杖瓦石。四者鬼魅所著。二者心病亦有四種。一者踴躍。二者恐怖。三者憂愁。四者愚癡。復次善男子。身心之病。凡有三種。一者業報。二者不得遠離怨對。三者時節代謝生。如是等因緣名字受

分別病。因緣者風等諸病。名字者心悶肺脹上氣。咳逆心驚下刺。受分別者頭痛目痛手足等痛。是名爲痛受所分別也。言種種苦惱者。此有二種。一即直指諸病有種種苦惱。二即兼攝餘諸苦惱。謂諸所有逼迫等事也。

經一切魔軍夜叉羅刹若鳩槃荼若毗舍闍若部多等。飲血噉肉諸惡鬼神皆悉遠離。或時發心親近守護。

△疏略說功德也。唯說離惡亦即現報。

鈔明魔鬼潛護中二義句。初明魔鬼遠離後顯發

心守護初言魔者。梵語具云魔羅。此云殺者。殺修
 行人智慧命故。此為生死之根本也。略說有四。一
 煩惱魔是生死因。二天魔是生死緣。三蘊魔四死
 魔是生死果。今言魔軍者。即天魔也。軍者眾也。即
 下鬼神皆魔軍眾也。言夜叉者。此云猛捷。即捷疾
 也。羅刹者。即食血肉之鬼類也。海中有羅刹城。人
 落其中。多遭食陷也。鳩槃荼者。此云守宮神。亦云
 冬瓜鬼。以其陰囊似冬瓜也。毗舍闍者。斂精氣鬼。
 餓鬼中此稍勝也。部多者。此云大身鬼。亦云自生
 鬼。此類若從父母生者。名曰夜叉。若自生者。名曰

部多飲血等者。總舉諸類也。皆悉遠離者。後結遠
 離也。亦即現報者。對生報。後報以滿三也。

△疏二偏舉一行廣顯眾德。二一舉一行。

經是故若人誦此願者

△疏舉一例餘。

△疏二廣辨德具多勝德不出五果。

鈔不出五果者。俱舍顯相云。異熟無記法。有情有
 記生。但是無覆無記。故不通餘從善惡因所感。名
 有情有記生。又瑜伽云。諸不善法於諸惡趣受異
 熟果。善有漏法於諸善趣受異熟果。等流似自因。

相似同類兼說自因。又瑜伽三十八云。習不善故樂住不善。則不善法增長。習善法故樂住善法。則善法增長。為等流果。或似先業後果。隨轉。此有二義。後義果似於因。即此意也。如殺生短命等。前義即後果之報。如前世樂於殺生。今還好殺等也。離繫由慧盡。離諸結縛名離繫果。慧者擇也。盡者滅也。謂此擇滅離繫所顯。故將擇滅釋離繫果。瑜伽論云。以道滅惑名離繫果。又諸異生以世俗道滅諸煩惱不究竟。故非離繫果。若因彼力生是果名。士用。若法因彼力生。如因下地加行力。上地有漏。

定生然離繫名為不生。由道力證得亦得名為不生。士用果也。除前有為法。有為增上果。謂有為法。生餘法不障。是增上果。故增上果。唯有為法。除前已生有為之法。非增上果。謂果望因。或俱。或後。必無前果後因。故云除也。除此前後餘諸有為。為增上果。論云。增上之果也。又瑜伽云。若眼識等。是眼根。增上果。乃至意識。是意根。增上果。眾生身分不散不壞。是命根。增上果。解云。眼等諸根。不障識生。身分不散不壞。令不斷命根。皆以不障義。邊名增上果也。仔細詳意用之。問。士用增上。何別。答。士用。

唯對作者增上通對所餘如匠所成對能成匠具
 得士用增上果名對餘非匠非匠非造故非士用
 也然上所引是俱舍根品彼以六因成斯五果非
 今所要今但以誦普賢行願一因自然具斯五果
 此與諸宗有因同果異如十地中同修五種十善
 感果各殊有因異果同如此因及六因也因果俱
 異可以意得也

670

△疏支三一通明五果一增上果

經行於世間無有障礙如空中月出於雲翳諸佛菩
 薩之所稱讚一切人天皆應禮敬一切眾生悉應供

養

△疏增上果有增上用故

△疏二等流果

經此善男子善得人身圓滿普賢所有功德不久當
 如普賢菩薩速得成就微妙色身具三十二大丈夫
 相

△疏等流果亦滿普賢功德行故

鈔言三十二相者一足下平如奩底二足下千輻
 輪三足跟梵王頂四手指纖長五其身方直六手
 足網縵七手足柔軟八節踝臚滿九身毛上靡十

671

鹿王騰十一其身圓滿十二垂手過膝十三頂有
 肉髻十四無見頂十五馬陰藏十六皮膚細滑十
 七身毛右旋十八身紫金色十九七處平滿二十
 柔軟聲二十一缺骨充滿二十二師子上身二十
 三臂肘臍纖二十四齒白齊密二十五四十齒二
 十六得二牙二十七師子頰二十八口中上味二
 十九廣長舌三十梵螺聲三十一目睫紺青三十
 二眉間白毫相等如是諸相下自三賢菩薩作轉
 輪王雖圓明已有此相乃至等覺猶經百劫修佛
 相好應知皆自十善為因百福莊嚴方得成滿言

百福者謂十善法具起百思如一不殺有五思謂
 離殺思勸導思讚美思隨喜思回向思如是乃至
 不邪見亦爾於一一相引布自身必須前起五十
 思乃引一相後起五十思以覆之前後合為百思
 名為百福百福具足方成一相此名共因如涅槃
 經師子吼語如是三十二相一一皆有別因如彼
 經云若有菩薩摩訶薩持戒不動施心不移安住
 實語如須彌山以是業緣得足下平如奩底相若
 於父母師長乃至畜生以如法財供養供給以是
 業緣得足下千輻輪相若不殺不盜於父母師長

常生歡喜。以是業緣得成三相。一手指纖長。二足
 跟長。三身方直。等若修四攝法。攝取有情。得網縷
 指如白鵝。王父母師長。若病疾時。自手洗拭。捉持
 按摩。得手足柔軟。若持戒聞法。惠施無厭。得二相。
 一節罽滿。二身毛上靡。若專心聽法。演說正教。
 得鹿王。踰相於諸有情。不生害心。飲食知足。常樂
 惠施。瞻病給藥。得身圓滿。如尼俱律陀。樹立手過
 膝頂。有肉髻。及無見頂見怖畏者。為作救護。見裸
 跣者。施與衣服。得馬陰藏。相親近智者。遠離愚人。
 善喜問答。掃治行路。得皮膚細軟。身毛右旋。若以

674

衣服飲食。具醫藥香華燈明。施人。得身金色。常
 光照耀。若行施時。所珍之物。能捨不吝。不觀福田
 及非福田。得七處滿。於布施之時。心不生疑。得柔
 軟聲。若如法求財。以用布施。得缺骨平滿。師子上
 身臂肘。膈纖。遠離兩舌惡口。志心得四十齒白齊
 密於諸眾生。修大慈悲。得二牙相。常作是願。有來
 求者。隨意給與。得師子頰。隨諸所須之食。悉皆與
 之。得味中上味。自修十善。兼以化人。得廣長舌。不
 須彼短。不謗正法。得梵音聲。見彼怨憎。生於喜心。
 得目紺色。不慮他德。稱揚其善。得白毫相。如斯一

675

一各別修之方能滿足三十二相今以普賢行願一因即能感此三十二相也。

△疏三異熟果

經若生人天所在之處常居勝族。

△疏異熟果乘因感果故。

△疏四士用果

經悉能破壞一切惡趣悉能遠離一切惡友悉能制伏一切外道。

△疏士用果有善菩薩用故。

△疏五離繫果

經悉能解脫一切煩惱如師子王摧伏羣獸堪受一切眾生供養。

△疏離繫果入支聖道滅煩惱故。

鈔言一切煩惱者謂根隨煩惱也根本有六。一貪二瞋三無明四慢五疑六不正見開即為十。開不正見為五。一身見二邊見三邪見四見取五戒禁取故開為十。即六通俱生十分別起是惑之根本。故名根本煩惱。二隨煩惱有二十。一忿二恨三惱四覆五誑六詭七憍八害九嫉十慳十一無慚十二無愧十三不信十四懈怠十五放逸十六昏沈

十七掉舉十八失念十九不正知二十散亂於中
 念等十箇名小隨無慚愧二名中隨不信等八名
 爲大隨以隨根本惑勢力而起故名隨煩惱也亦
 通俱生分別分別起者行相麤淺入見即除俱生
 起者行相微細至果方盡總舉諸惑故云一切也
 如師子王等者師子獸中之王一吼之時眾獸潛
 伏行願威神亦復如是由茲行願正念現前乃至
 成佛永斷諸惡故云如等言八支聖道者即八正
 道也謂正見正思惟正語正業正命正精進正念
 正定等八也鑒理無邪曰正見籌慮正義名正思

惟無漏語業名正語無漏身業名正業身語無邪
 爲正命如理策勤名正精進順法錄心名正念無
 漏三昧名正定八中正見是道亦支餘之七法唯
 支非道所以通云正道者一則解翻八邪二則體
 是聖道故也。

△疏二別明淨土果二一顯法功能。

經又復是人臨命終時最後刹那一切諸根悉皆散
 壞一切親屬悉皆捨離一切威勢悉皆退失輔相大
 臣宮城內外象馬車乘珍寶伏藏如是一切無復相
 隨。

鈔淨土果中釋文分二先顯法功能後別明勝果
 前中經文義分爲三先世果終失次此願不離後
 引生淨土今初如俱舍論通說臨終之時有多般
 事或惡業緣厚者有斷末摩苦熱於身中有極少
 節解便致死是爲末摩苦地水火風隨一增減如
 利刀刃觸彼末摩因此便生增上苦受業斯不久
 遂致命終又復人間復有多種死相或中他毒藥
 或風病失音或鬼神所錄或懷胎媿難或大水漂
 溺或野火所燒或惡獸傷殘或無辜誅戮或雷電
 霹靂或戰陣敗亡或王法臨刑或冤家鋒刃諸般

捨壽難可具名乃至諸天命將終位亦先有五種
 小衰相現一者衣服出非法聲二者自身光明忽
 然味劣三者於沐浴位水滯著身四者本性驕馳
 今滯一境五者眼木凝寂今數瞬動此五相現定
 死不疑也復有五種大衰相一衣染塵垢二華鬢
 萎萃三兩腋汗出四鼻氣入身五不樂本座此五
 相現必定應死金光明經說人死之相云兩眼白
 色變舌黑鼻梁欹耳豎項筋垂下脣垂向下又涅槃
 經云於醫人所不生恭敬心於諸親友生荆棘心
 此是死相如寶積經說最後捨壽之際心極明了

一切善惡皆悉現前畏喜心生即便往趣也。此卽通說一切死相今誦持人卽不爲彼如是惡相之所逼迫也。二諸根散壞。三親屬捨離。四威勢退失。五一切不隨。文顯可知。

經唯此願王不相捨離於一切時引導其前。一刹那中卽得往生極樂世界。

鈔此願不離義分爲三。一願王不離。二引導長時。三得生極樂。言極樂世界者。謂其國眾生無有眾苦。但受諸樂。故名極樂。或名安樂。亦名安養。卽阿彌陀佛所依之國土。其國乃地瑩七珍。池通八德。

風搖樹響與天樂以齊鳴。水激清波將法音而同韻。是以六方調御。金口稱揚。三世如來。致心護念。總斯多義。故以爲名也。

△疏謂報盡捨命。一切不隨。唯此願王引生淨土。同無常經眷屬皆捨去。財貨任他將。但持自善根。險道充食糧。

△疏二別明勝果二。一正明化生。

經到已卽見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩色相端嚴。功德具足。所共圍繞。其人自見生蓮華中。象佛授記。

疏亦異熟果乘此善因淨土生故。

鈔後別明勝果分二。先正明化生後得授記下。顯利生大用。初中經文分三一。得見聖眾。二顯聖德相。三見生蒙記。初中言阿彌陀佛者。此云無量壽。由二義故名阿彌陀。一光明無量故。二壽命無量故。故阿彌陀經云。彼佛何故號阿彌陀。彼佛光明無量無邊。照十方國。無所障礙。是故號為阿彌陀。彼佛壽命及其人民無量無邊。阿僧祇劫。故名阿彌陀。由昔因中大願。光明與壽俱無量故。故以名焉。故大無量壽經云。設我得佛。光明有限。下至不

684

照百千億那由他諸佛國者。不取正覺。又云。若我成佛。壽量有限。下至億那由他百千及算數劫者。不取菩提。璘云。阿彌陀者。六十萬億那由多恆河沙由旬。是其身無量無邊。不可思議。阿僧祇劫。是其壽。目澄四海。毫釐五山。光明無有涯眷。屬不知數。足不行而十方徧。口不言而萬類聞。左侍觀音。右翼勢至。國有十善。土無三惡。一稱名字。滅殃罪八十億劫。一禮形像。獲相好八萬四千。舉手低頭。無非是益也。文殊師利者。總有四翻。正法華名。溥首。有經名。濡首。正云妙德。或云妙吉祥。以其降生

685

時有十種奇瑞故。一光明滿室。二甘露盈庭。三地湧七珍。四神開伏藏。五雞生鳳子。六豬誕龍胎。七馬產騏驎。八牛生白澤。九倉盈金粟。十象生六牙。有斯徵瑞。名妙吉祥也。又悲華經說過去寶藏佛時。為無諍念王第三子。名曰帝眾。佛前願取妙淨土。佛言。汝自發願取妙淨土。我今號汝為文殊師利。此表淨土諸吉祥事。其來久矣。今助佛導化。示生舍衛多羅聚落。為梵德婆羅門子。香山云。德妙而十方普現道尊。為諸佛所師。昔度五百仙人。韜光雪嶺。今與一萬菩薩。見住涼山。廣如大經等說。

也。普賢可知。言觀自在菩薩者。解釋絕多。嘉祥云。謂於六根門中。而得自在。故以名焉。慈恩就三業解三業。歸向必六通。赴緣攝利難思。名觀自在也。賢首就悲智解。謂於理事無礙之境。觀達自在。又觀機往教。自在無礙。故以名焉。又諸菩薩至八地中。得十自在。一命自在。於不可說劫住壽命。故二。心自在。智慧能入無數三昧。故三。資具自在。能以無量莊嚴一切世界。故四。業自在。隨時受報。故五。受生自在。於一切世界示現受生。故六。緣自在。於一切世界見佛充滿。故七。願自在。隨欲隨時受報。

故於諸刹中成正覺故。八神力自在示現一切大神變故。九法自在示現無邊諸法門故。十智自在於念念中示現如來十力無畏成正覺故。第五十五說得是自在故以為名。言彌勒者。此云慈氏。如慈心因緣經說。乃往過去無量無邊阿僧祇時。有世界名勝華敷。佛號彌勒。恆以慈心四無量法教化一切。時有婆羅門名一切智光。具六十四能。多知博達。聞佛說經。即生難詰。不能屈伏。便發信心。而發願言。願持此經。必得成佛。號曰彌勒。即捨家入山。經八千歲。常持彼經。常習慈行。又於過去與

688

釋迦同於弗沙佛所發菩提心。常習慈定。自是已來。常號彌勒。亦名阿逸多。此曰無能勝。大慈善根。無能勝。故為波羅奈國輔相之子。身紫金色。有三十二相。香山云。莊嚴淨國。而度有情。起道乃先於釋迦降跡。猶當於補處。哀吾師遺法弟子。恐更沈淪。龍華三會之時。皆垂度脫。今即示居觀史。引導閻浮深慈重恩。永劫寧報善財。遇之得解脫。門名曰入三世一切境界。不忘念智莊嚴藏也。問生極樂國。得見阿彌陀佛。觀自在菩薩。其事必爾。又普賢身。即淨法界身。一切佛體。得見無妨。其文殊彌

689

勒在此娑婆今言往彼又云得見為同異耶答此
 有二義一即體異名同如說壽經時西方亦有無
 量壽佛等同讚故知但是名同體別異也二云是
 同非異何以如文殊師利佛道父母大權應現助
 佛揚化徧周法界現種種身利樂羣品如彌勒為
 善財說文殊師利最勝大願非餘無量百千那由
 他等菩薩之所能有又言文殊師利其行廣大無
 量無邊其願無際相續不斷常能出生一切菩薩
 最勝功德常為無量菩薩之師令其勤修深證入
 故普於十方常轉法輪教化成熟一切眾生常於

十方一切世界為說法師常為不可說不可說一
 切諸佛大會眾中之所讚歎也彌勒菩薩如大經
 說云成就一切徧趣行故於諸生處而得自在又
 言我身普生一切法界一切眾生顯示道相殊異
 言音種種名號種種欲樂種種威儀隨順世間教
 化調伏顯示眾生清淨受生隨順趣入一切眾生
 甚深勝解一切菩薩大願受化如是等無量所顯
 而現其身種種相貌種種威德充滿法界為欲成
 熟往昔同行退失菩提者示現於此閻浮提中又
 為成熟兜率天中同行天故令知諸天盛必衰故

爲欲示現降生瑞相教化成熟釋迦如來所遺來者。令如蓮華悉開悟故於此處眾生兜率天等故知是同非異也。或可名同體異亦無妨也。言等者等取諸餘新賢舊聖及常隨侍諸菩薩等。故阿彌陀經云其國中多有一生禱處其數甚多非是算數所能却之。但可以無量無邊阿僧祇劫說等。但生彼國無不皆見也。二顯聖德相三見生蒙記可知。

692

△疏二利生大用。

經得授記已經於無數百千萬億那由他劫普於十

方不可說不可說世界以智慧力隨眾生心而爲利益。

△疏亦士用果。

鈔後明利生大用中二先明得記後顯利生。利生文中分三初標利生時。次顯利生處。後正明利生上來有二先正明化生後顯利生大用總是別明勝果。前來有二先顯法功能後別明勝果總是明淨土果訖。

693

△疏三究竟成佛果。

經不久當坐菩提道場降伏魔軍成等正覺轉妙法

輪能令佛刹極微塵數世界眾生發菩提心隨其根性教化成熟乃至盡於未來劫海廣能利益一切眾生。

△疏亦離繫果究竟離故。然前段中初一現報果。今此成佛卽後報果中間諸果皆是生報。唯誦一行五果具足三報昭彰終至菩提于何不習。

鈔自下第三究竟成佛果有二。先銷經文後釋疏。文前文六一身坐道場。二降魔成佛。三傳法利生。四令眾發心。五隨機成熟。六廣益無盡。初中坐者。如大經說菩薩摩訶薩有十種坐。所謂轉輪王坐。

694

興十善道故。四天王坐於一切世間自在安立佛法。故帝釋坐與一切眾生爲勝主。故梵天坐於自他心得自在。故師子坐能說法。故正法坐以總持辯才力而開示。故堅固坐誓願究竟。故大慈坐令惡眾生悉歡喜。故大悲坐忍一切苦不疲厭。故金剛坐降伏眾魔及外道。故是爲十坐。若諸菩薩安住此法則得如來無上正覺。坐餘如下偈中述。

△疏三結勸受持。三一結前勝德。經善男子。彼諸眾生若聞若信此大願王受持讀誦。廣爲人說。所有功德除佛世尊餘無知者。

695

△疏上猶略歎。今說無盡。

△疏二正明勸持。

經是故汝等聞此願王莫生疑念。應當諦受。受已能讀。讀已能誦。誦已能持。乃至書寫。廣為人說。

△疏通十法行。

△疏三重舉勝德。

經是諸人等於一念中所有行願。皆得成就。所獲福聚無量無邊。能於煩惱大苦海中。拔濟眾生。令其出離。皆得往生阿彌陀佛極樂世界。

△疏殷勤頌德。意在勸持。然此經一卷。文少義豐。質

修行之玄樞。乃華嚴之幽鍵。功高德遠。何不修持。西域王臣。未有不習。

鈔大文第三善男子。彼諸眾生下。結勸受持分文。

二先標分後釋解。三段如疏文顯。可知重舉德中。經言皆得往生等者。自此詣彼。名之為往也。準十六觀經說。往生之人。總有九品。隨其品類。隨其行業。方得往生。言九品者。一上品。上生發三種心。謂菩提心等。又有三種。一者慈心不殺。具諸戒行。二者讀誦大乘方等經典。三者修行六念。回向發願。具此一日。乃至七日。壽尊與二菩薩。無數化佛。聲

聞大眾執金剛臺至行者前授手迎接纔生彼國
 卽悟無生須臾至十方界名上品上生二上品中
 生謂於第一義心不驚動深信因果不謗大乘壽
 尊與二菩薩持紫金臺至行者前與千化佛一時
 授手一念生彼大寶華中經宿卽開七日便得菩
 提不退飛行十方名上品中生三上品下生亦信
 不謗但發大菩提心臨終見佛與二菩薩持金蓮
 華五百化佛一時授手一日一夜蓮華乃開至七
 日後卽得見佛三七日後遊歷十方蒙佛授記名
 上品下生四中品上生不造五逆持五八戒臨終

698

見佛讚歎出家得離眾苦便坐華臺未舉頭頃卽
 生淨土蓮華尋開得阿羅漢果名中品上生五中
 品中生受持八戒若一晝夜持沙彌戒若具足戒
 威儀無缺臨終見佛慰喻往生七日華開得預流
 果六中品下生孝養父母行世仁慈遇人爲說佛
 土功德及法藏比卅四十八願雖不見佛命終亦
 生七日華開亦得預流果七下品上生雖不謗經
 如此愚人多造惡業無有慚愧臨終聞讚大乘十
 二部經文復稱佛號化佛慰喻卽得往生經七七
 日華開見聖聞甚深法八下品中生毀犯眾戒偷

699

僧祇物不淨說法無有慚愧諸惡嚴身臨命終時
 獄火俱至遇善知識為說如來十力威德光明神
 力及戒定慧解脫解脫知見聞已除滅八十億劫
 生死重罪火變涼風化佛迎接一念往生六劫華
 開發無上道意九下品下生五逆十惡具諸不善
 應隨惡道受苦無窮臨終苦逼不遑念佛但稱名
 號令聲不絕具足十念命終之後見金蓮華一念
 往生滿十二劫花開得聞諸法實相除滅罪行發
 無上道意是卽九品往生各各須具多種功德方
 得往生也又如大藏中有百餘本或經或論說修

彼因莫非勤積方得生彼今唯誦經一行一刹那
 中便得往生蒙佛授記甚為奇妙也疏言豐者多
 也極謂樞機鍵卽關鍵餘文可知也

大方廣佛華嚴經普賢行願品別行疏鈔卷第十二